



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 143/3 Prot

Tiranë, më 27/03 /2015

V E N D I M

Nr. 07, datë 27/03 2015

Në mbështetje të Ligjit Nr. 9887, datë 10.03.2008 "Për Mbrojtjen e të Dhënave Personale", i ndryshuar, si dhe Ligjin Nr. 8485, datë 12.05.1999 "Kodi i Proçedurave Administrative të Republikës së Shqipërisë", pas shqyrtimit të materialit dhe mendimit paraprak të Drejtorisë së Hetimit Administrativ, në ngarkim të kontrolluesit, **Unioni i Shoqërive të Kursim Kreditit "Jehona" Tiranë**,

V Ë R E J S E :

Mbi bazën e Urdhrit nr. 19 datë 12/02/2015 të Komisionerit, është realizuar inspektimi administrativ mbi bazë ankese, pranë kontrolluesit, Unioni i Shoqërive të Kursim Kreditit "Jehona", Tiranë. Objekti i këtij inspektimi ishte: "*Verifikimi i ankesës së subjektit të të dhënave personale V.N, në lidhje me përpunimin e të dhënave dhe informacionit personal të tij, nga kontrolluesi Unioni i Shoqërive të Kursim Kreditit Jehona*".

Kontrolluesi, Unioni i Shoqërive të Kursim Kreditit "Jehona", është bashkim i Shoqërive të Kursim Kreditit që veprojnë në Republikën e Shqipërisë, i licensuar nga Banka e Shqipërisë, me licensë nr. 1 datë 27/08/2002.

Unioni i Shkk-ve" është bashkimi vullnetar i Shkk-ve të veçanta me objekt veprimtarie financiare brenda rrjetit të Shoqërive të Kursim Kreditit, si mbikëqyrja, kontrolli i shoqërive anëtare të Unionit, nxitja, organizimi dhe zhvillimi i Shoqërive Kursim Kreditit, etj.

Kontrolluesi, në ushtrimin e veprimtarisë së tij mbështetet në ligjin nr. 8782, datë 03/05/2001 "*Për shoqëritë e kursim kreditit*", ligjin nr. 8269 datë 23/12/1997 "*Për Bankën e Shqipërisë*", ligjin 8365 datë 02/07/1998 "*Për bankat në Republikën e Shqipërisë*", në udhëzimet e Bankës së Shqipërisë, si dhe aktet rregullative që ai nxjerr.

Inspektimi administrativ i kryer pranë këtij kontrolluesi, në radhë të parë u fokusua në trajtimin e ankesës së subjektit të të dhënave personale N.V dhe në aspektin e mbikëqyrjes për zbatueshmërinë e ligjit nr. 9887 datë 10/03/2008 "*Për Mbrojtjen e të Dhënave Personale*", i ndryshuar, në ushtrimin e veprimtarisë së kontrolluesit, për shkak se kontrolluesi mbledh, përpunon të dhëna personale për një kategori të gjerë subjektësh të të dhënave personale, ka akses në përpunimin elektronik të të dhënave pranë Regjistratit të Kredive, i administruar nga Banka e Shqipërisë, si dhe faktit të konstatimit të mungesës së akteve rregullative në fushën e mbrojtjes së të dhënave personale.

Në lidhje me ankesën e subjektit të të dhënave personale N.V rezultoi se, kontrolluesi Unioni i Shoqërive të Kursim Kreditit “Jehona”, si një institucion raportues pranë Bankës së Shqipërisë, ka akses në Regjistrin e Kredive të mbajtur nga kjo e fundit.

Në datën 24/11/2014, kontrolluesi ka aksesuar këtë Regjistër dhe ka bërë kërkime për subjektin e të dhënave personale N.V, lidhur me statusin e kredimarrjes, ekspozimin kreditor të tij, në sistemin bankar, duke nxjerrë një raport kredie nga regjistri.

Raporti i kredisë për subjektin e të dhënave N.V është nxjerre për llogari të Shoqërisë Kursim Kreditit “Vlora Kredit” në Vlorë, mbi bazën e një kërkesë që kjo shoqëri ka përcjellë në rrugë elektronike në datën 24.11.2014.

Nga përmbajtja e kërkesës (e-mailit), administruar si provë dhe deklaratimet e Drejtoreshës Ekzekutive të kontrolluesit, Unioni i Shoqërive të Kursim Kreditit “Jehona” rezulton se, subjekti i të dhënave personale N.V, nuk e ka dhënë pëlqimin për përpunimin e të dhënave personale të tij, të gjendura në Regjistrin e Kredive të Bankës së Shqipërisë.

Kontrolluesi, Unioni i Shoqërive të Kursim Kreditit “Jehona”, si në rastin e ankesës së subjektit N.V, por dhe në raste të tjera të aksesimit të Regjistrin të Kredive të Bankës së Shqipërisë, për llogari të Shoqërive të Kursim Kreditit anëtare të Unionit, në momentin e kërkimit/aksesimit të Regjistrin të Kredive, nuk dokumenton dhënien e pëlqimit të subjekteve të të dhënave personale, (deklarata e pëlqimit paraprak), për përpunimin e të dhënave personale në Regjistrin e Kredive, pranë Bankës së Shqipërisë, (kjo rezultoi nga inspektimi i kërkimeve më të hershme në sistemin elektronik të bërë nga kontrolluesi).

Grupi i inspektimit administrativ mbajti procesverbalin e inspektimit në të cilin u konstatua se, kontrolluesi Unioni i Shoqërive të Kursim Kreditit “Jehona”, *ka bërë mbledhjen, përpunimin e të dhënave personale të subjektit të të dhënave N.V. (emrin, mbiemrin, atësia, datëlindja, statusin dhe gjendjen financiare të kredimarrjes në institucione financiare), me qëllim aksesimin pranë Regjistrin të Kredive, administruar nga Banka e Shqipërisë, për të nxjerrë “Raportin e kredisë” për subjektin e të dhënave N. V, pa verifikuar marrjen e pëlqimit nga ana e këtij subjekti.*

Konstatimi i mësipërm u konsiderua shkelje administrative të parashikuar nga kreu II “Parimet e përpunimit” të ligjit nr. 9887 “Për Mbrojtjen e të Dhënave Personale”, i ndryshuar.

Mos respektimi nga kontrolluesi, gjatë përpunimit të të dhënave, i kushteve dhe kriterëve ligjore të parashikuara në ligjin nr. 9887, datë 10.03.2008 “Për Mbrojtjen e të Dhënave Personale” i ndryshuar, përpunimi i të dhënave të mbledhura, apo të regjistruara në bazën e të dhënave, pa pëlqimin e subjektit të të dhënave, i ligjit nr. 8269 datë 23/12/1997 “Për Bankën e Shqipërisë”, ligjit 8365 datë 02/07/1998 “Për bankat në Republikën e Shqipërisë” dhe “Rregullores për funksionimin e Regjistrin të Kredive në Bankën e Shqipërisë” bën që, kontrolluesi të ndodhet para një përpunimi të paligjshëm të të dhënave personale të subjektit të të dhënave personale N.V.

Në zbatim të neneve 93-96 të ligjit nr. 8485, datë 12.05.1999 “Kodi i Procedurave Administrative të Republikës së Shqipërisë”, pasi është njoftuar paraprakisht, në ambientet e Zyrës së Komisionerit në datën 05/03/2015, është zhvilluar scanca dëgjimore në praninë e përfaqësueses të kontrolluesit, Unioni Shoqërive të Kursim Kreditit “Jehona”. Pasi u shqyrtuan përsëri shkeljet, të bëra të njohura edhe nëpërmjet procesverbalit të konstatimit, nga ana e përfaqësueve të kontrolluesit, nuk u paraqitën kundërshtime në lidhje me konstatimin e shkeljeve.

Sipas nenit 3, pika 24 "Pëlqim i subjekteve të të dhënave, është çdo deklaratë me shkrim, e dhënë shprehimisht me vullnet të plotë e të lirë dhe duke qënë në dijeni të plotë për arsyen pse të dhënat do të përpunohen, çka nënkupton që subjekti i të dhënave pranon që të përpunohen të dhënat e tij".

Rezultoi e provuar gjatë inspektimit administrativ se kontrolluesi në mbledhjen, përpunimin e të dhënave personale të subjektit N.V nuk ka respektuar kushtet dhe kriteret ligjore të përpunimit të ligjshëm të të dhënave personale, që parashikon kreu II, "Përpunimi i të dhënave personale" i Ligjit nr. 9887, datë 10.03.2008 "Për Mbrojtjen e të Dhënave Personale", i ndryshuar.

Kontrolluesi, Unioni i Shoqërive të Kursim Kreditit "Jehona" është në shkelje të nenit 5, pika 1/a: Mbrojtja e të Dhënave Personale, bazohet: a) në përpunimin në mënyrë të drejtë dhe të ligjshme dhe shkronja "ç"; "Në saktësinë që të dhënat duhet të kenë...".

Neni 5, pika 2 e ligjit përcakton se: "kontrolluesi është përgjegjës për zbatimin e këtyre kërkesave në të gjitha përpunimet automatike ose me mjete të tjera të të dhënave".

Kontrolluesi, Unioni Shoqërive të Kursim Kreditit "Jehona" është në shkelje të nenit 6 pika 1/a të ligjit, "Të dhënat personale përpunohen vetëm: a) nëse subjekti i të dhënave personale ka dhënë pëlqimin".

Mos respektimi nga kontrolluesi, gjatë përpunimit të të dhënave, i kushteve dhe kriterëve ligjore të parashikuara, në nenin 5 dhe 6 të ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar, përpunimi i të dhënave të mbledhura, apo të regjistruara në bazën e të dhënave, pa pëlqimin e subjektit të të dhënave, bën që kontrolluesi të ndodhet para një përpunimi jo të ligjshëm të të dhënave personale të këtij subjekti.

Si përfundim, në kuptim të nenit 39 pika 1, shkronja "a", të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, shkeljet e konstatuara gjatë ushtrimit të inspektimit administrativ, përbëjnë "**kundërvajtje administrative**" dhe sanksionohen me gjobë, si më poshtë:

– Kontrolluesit ose përpunuesit, që përdorin të dhëna personale në kundërshtim me kreu II, "Përpunimi i të dhënave personale", dënohen me gjobë, në vlerën nga 10 000 deri në 500 000 lekë.

Kontrolluesi është person juridik dhe bazuar në nenin 39/2 të ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar, personat juridikë, për kundërvajtjen e mësipërme, dënohen me dyfishin e gjobës.

Për zgjedhjen e masës së gjobës, Zyra e Komisionerit ka parasysh faktin se shkeljet e konstatuara janë serioze, pasi lidhen me të drejta të rëndësishme të subjektit, për të pasur një përpunim të ligjshëm të të dhënave personale nga kontrolluesi, i cili detyrohet të garantojë dhe respektojë privatësinë e individit. Zyra e Komisionerit, ka parasysh gjithashtu, ushtrimin në mënyrë të paligjshme të aktivitetit në mënyrë të përsëritur nga ana e kontrolluesit, jo vetëm për rastin konkret por, në tërësinë e veprimtarisë, edhe në lidhje me subjekte të tjera, të kategorisë "anëtarë" faktin që kontrolluesi është person juridik dhe shkallën e bashkëpunimit të kontrolluesit, gjatë ushtrimit të inspektimit administrativ.

PËR KËTO ARSYE:

Në zbatim të neneve 5, 6, 30, 39/1/a, 40, 41 të Ligjit Nr. 9887, datë 10.03.2008 "Për Mbrojtjen e të Dhënave Personale" i ndryshuar, si dhe nenet 107-109 të Ligjit Nr. 8485, datë 12.05.1999, "Kodi i Procedurave Administrative të Republikës së Shqipërisë",

V E N D O S A:

1. Dënimin e kontrolluesit, **Unioni i Shoqërive të Kursim Kreditit "Jehona"** me gjobë, në vlerën **100 000** (njëqind mijë) lekë për shkelje të detyrimeve të përcaktuara në kreun II, "Përpunimi i të Dhënave Personale" të Ligjit Nr. 9887, datë 10.03.2008 "*Për Mbrojtjen e të Dhënave Personale*", i ndryshuar.
2. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e këtij afati, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
3. Kundër këtij vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve.

Ky vendim u shpall sot më datë 27/032015.

